



Trg mladih 8, Zona 1A, drugi sprat-kat / 76100 Brčko distrikt BiH, tel: 049/490-135, web: www.sukobinteresabd.ba, e-mail: info@sukobinteresabd.ba
Трг младих 8, Зона 1А, други спрат / 76100 Брчко дистрикт БиХ, тел: 049/490-135, веб: www.sukobinteresabd.ba, е-пошта: info@sukobinteresabd.ba

Broj: KSI-09-154/25

Datum: 23.07.2025. godine

Na osnovu člana 25. tačka g) Zakona o sprečavanju sukoba interesa u institucijama Brčko distrikta Bosne i Hercegovine („Službeni glasnik Brčko distrikta Bosne i Hercegovine“ broj: 04/21) i člana 25. stav (2) Poslovnika o radu Komisije za odlučivanje o sukobu interesa, postupajući po anonimnoj prijavi od 08.07.2025. godine, protiv V.V. nosioca javne funkcije, člana [REDACTED], radi utvrđivanja sukoba interesa, Komisija za odlučivanje o sukobu interesa, na 126. sjednici održanoj dana 23.07.2025. godine, donosi

ODLUKU

Postupak za odlučivanje o sukobu interesa protiv V.V., nosioca javne funkcije, člana [REDACTED], neće se pokrenuti, obzirom da iz dokumentacije i radnji ne proizilazi da je u postupanju nosioca javne funkcije došlo do povrede odredaba Zakona o sprečavanju sukoba interesa u institucijama Brčko distrikta Bosne i Hercegovine, odnosno postojanja sukoba interesa.

Образложење

Dana 08.07.2025. godine Komisija za odlučivanje o sukobu interesa zaprimila je anonimnu prijavu broj: KSI-09-154/25, radi sumnje na povredu odredaba Zakona o sprečavanju sukoba interesa u institucijama Brčko distrikta Bosne i Hercegovine, odnosno postojanja sukoba interesa protiv V.V., nosioca javne funkcije, člana [REDACTED].

U prijavi je navedeno da je V.V. stalno zaposlen u [REDACTED] te da Komisiji za odlučivanje o sukobu interesa nije prijavio iznos bruto i neto plate za 2024. i 2025. godinu, jer isti nije vidljiv na internet stranici Komisije. Nadalje se navodi da je ista objavljena za 2022. godinu, te da zbog toga pretpostavlja da ti podaci nisu izuzeti od javne objave, te da je V.V. lažirao da je zaposlen u [REDACTED] kao [REDACTED]. U prijavi se takođe navodi da je istina da je V.V. stalni zaposlenik u [REDACTED] i da namjerno ne prijavljuje iznos plate odnosno prijavljuje manji iznos plate, te da je zaposlen i kao Šef [REDACTED] na području Brčko distrikta BiH.

Uvidom u registar javnih funkcija i nosilaca javnih funkcija, kao i dokumentaciju koju posjeduje Komisija utvrđeno je da V.V. obavlja funkciju člana [REDACTED] na osnovu Odluke o imenovanju članova [REDACTED], broj: [REDACTED] od 05.07.2024. godine, te je samim tim shodno članu 2. stav (1) tačka b) i tačka c) Zakona o sprečavanju sukoba interesa u institucijama Brčko distrikta Bosne i Hercegovine nosilac javne funkcije i upisan je u Registar javnih funkcija i nosilaca javnih funkcija.

Članom 2. tačkom b) propisano je da je „javna funkcija“ funkcija izabranog ili imenovanog lica u organima i institucijama Distrikta, u pravnim licima koje osniva Distrikt kao i u pravnim licima kojima je povjereno vršenje javnog ovlaštenja i lica koje je imenovano, odnosno na čiji izbor ili imenovanje saglasnost daje Skupština Brčko distrikta Bosne i Hercegovine (u daljnjem tekstu: Skupština), odnosno Vlada Brčko distrikta Bosne i Hercegovine (u daljnjem tekstu: Vlada), ukoliko drugim zakonom nije drugačije propisano. Tačkom c) navedenog člana Zakona propisano je da je „nosilac javne funkcije“ izabrano ili imenovano lice u organima i institucijama Distrikta, u pravnim licima koje osniva Distrikt kao i u pravnim licima kojima je povjereno vršenje javnih ovlaštenja i lica koje je imenovano, odnosno na čiji izbor i imenovanje saglasnost daje Skupština, odnosno Vlada, ukoliko drugim zakonom nije drugačije propisano.

U cilju provjere navoda iz prijave, Komisija je uputila dopis [REDACTED] zahtijevajući dostavu pravnih akata kojima je propisano da se određeni podaci kao što su nazivi pozicija, plate i sl. zaposlenih u [REDACTED] moraju izuzeti od javne objave, odnosno da predstavljaju poslovnu tajnu. [REDACTED] je dopisom broj: 07/1-28966/25 od 14.07.2025. godine, dostavila obavještenje za V.V., navodeći da se radna mjesta i plata zaposlenih određuju internim aktom poslodavca tačnije [REDACTED] i da oni predstavljaju tajni podatak u skladu sa Zakonom o zaštiti tajnih podataka.

Naime, članom 8. Zakona o zaštiti tajnih podataka BiH („Službeni glasnik BiH“ br.54/05 i 12/09) propisano je da se pod tajnim podatkom smatra podatak čije bi otkrivanje neovlaštenoj osobi, sredstvima javnog informisanja, organizaciji, instituciji, organu ili drugoj državi, odnosno organu druge države, moglo prouzrokovati ugrožavanje integriteta Bosne i Hercegovine, naručito u oblasti: a) javne sigurnosti, b) odbrane, c) vanjskih poslova i interesa, d) obavještajnih i sigurnosnih interesa Bosne i Hercegovine, e) komunikacionih i drugih sistema važnih za državne interese, sudstvo, projekte i planove značajne za odrambenu i obavještajnu-sigurnosnu djelatnost, f) naučnih, istraživačkih, tehnoloških, privrednih i finansijskih poslova od važnosti za sigurnost funkcioniranja Bosne i Hercegovine, odnosno sigurnosnih struktura na svim nivoima državne organizacije Bosne i Hercegovine.

Shodno navedenom, podaci o platama i radnim pozicijama zaposlenih u [REDACTED] ne objavljuju se na internet stranici Komisije od momenta zahtjeva nosioca javne funkcije da se ne objavljuju podaci, jer se radi o informacijama klasifikovane prirode i iste podliježu režimu zaštite tajnih podataka. Njihova javna objava nije dozvoljena s obzirom na zakonske propise koji uređuju zaštitu tajnih podataka i u skladu sa djelovanjem [REDACTED], tako da otkrivanje istih može ugroziti sigurnost, operativnu funkcionalnost i zakonito djelovanje zaposlenih u [REDACTED]. Međutim, svi relevantni podaci na koje ukazuje prijava su Komisiji poznati i dostupni jer su prijavljeni u Izvještaju o imovinskom stanju nosioca javne funkcije za 2024. godinu, i potkrijepljeni odgovarajućim aktom.

Članom 28. [REDAKCIJA] („Službeni glasnik BiH“, br. [REDAKCIJA]) propisano je da generalni direktor [REDAKCIJA] donosi niz podzakonskih akata, uključujući i Pravilnik o platama, Pravilnik o zaštiti tajnih podataka i pohranjivanju podataka, propise koje se odnose na distribuciju podataka i druge interne akte, koji dodatno uređuju pristup i obradu podataka o ličnim primanjima zaposlenih, pri čemu su takvi podaci dostupni isključivo ovlaštenim licima i nadležnim državnim organima.

Imajući u vidu sve navedeno, utvrđeno je da V.V., kao nosilac javne funkcije, nije povrijedio odredbe Zakona o sprečavanju sukoba interesa u institucijama Brčko distrikta Bosne i Hercegovine, odnosno da ne postoji sukob interesa, jer nisu utvrđene okolnosti koje bi ukazivale na moguću povredu odredaba Zakona od strane nosioca javne funkcije.

Pouka o pravnom lijeku:

Protiv ove Odluke nije dozvoljena žalba, ali se može pokrenuti upravni spor pred Osnovnim sudom Brčko distrikta Bosne i Hercegovine u roku od 30 dana od dana prijema ove Odluke.

Predsjednik
Komisije za odlučivanje o sukobu interesa

Admira Mujić. dipl. pravnik

Dostaviti:

- Anonimnom podnosiocu putem oglasne ploče
- Evidenciji i
- Arhivi.